

Kombo ya Nkolo na biso Yesu Kristo epambolama.

Ebombelo moko monene ya monguna ezali bobangi. Biblia eyebisi biso ete bobangi ezalaka na etumbu (1 Yoane 4:18 – Mokanda na Bomoi). Lelo oyo tokotala ete etumbu monene ya bobangi ezali nini.

Soki totáangi Masese 10:24 (Mokanda na Bomoi), Biblia elobi boye:

“Likambo oyo moto mabe azali kobanga, yango moko nde ekomelaka ye; kasi moto ya sembo azuaka oyo azali kolikya.”

Lelo oyo, motema ya bokristo ezali lisusu te na mateya ya lobiko mpe Bokonzi ya Likolo, kasi ezali koleka mingi na mateya ya kindoki mpe misala ya banganga. Ezali kosalema ete moto ayebi ata te nini ezali batisimo ya Molimo Mosantu, kasi soki otuni ye makambo ya bandoki, ayebi yango banda A ti Z. Likambo yango ezali likama monene. Nalobi te ete kindoki ezali te, kasi tómituna: Biblia epesi kindoki kilo nini na bomoi na biso ya lobiko ya mokolo na mokolo?

Mpo na nini bantoma to Nkolo Yesu ye moko bateyaki biso mingi te, to batikalaki kokoba koloba mingi te na makambo ya bandoki? Okanisi ete

bandoki bazalaki te? Bazalaki mingi penza, kasi bayebaki nguya mosusu oyo eleki bango nyonso, mpe yango nde basalaki ete bato bandima yango, mpo bayebaki ete soki moto azwi nguya yango, azali na libateli ya kokoka liboso ya nguya nyonso ya monguna.

Bobangi ya kindoki esimbi bato mingi, mpe likambo ya mawa koleka, esimbi ata bakristo oyo babiki mpe, bango oyo basengelaki kozala ya liboso ya kotiola makambo wana.

Lelo oyo, talá mwa bandakisa ya bobangi oyo esimbi bato mingi:

— Soki omoni mokusa (mjusi) na ndako na yo, mpe olobi ete ezali molimo, yeba ete bobangi esili kokanga yo.

— Soki omoni mpuku, mende, basimizi, konokono, to nzinzi — biloko oyo esengaka kaka bopeto mpo elongwa — kasi olobi ete ezali milimo, yeba ete bobangi ezali kati na yo.

— Soki omoni nyau mpe oyoki ete bandoki bayaki kotala yo, yeba ete bobangi ezali kati na yo.

— Soki omoni moto moko mpe oyoki ete azali ndoki mpe akosala yo mabe na nguya ya molili, yeba ete bobangi ezali kati na yo, mpe bongo na bongo.

Lokola Biblia elobi ete bobangi ezalaka na etumbu, yeba ete etumbu

yango nde oyo:

*“Likambo oyo moto mabe azali kobanga, yango moko nde
ekomelaka ye.”*

Yango nde etumbu!

Soki omoni molimo na konokono, yeba ete satana akomi kosala mosala na nzela ya konokono yango, mpe ekomi solo molimo ya bomoi, mpe mabe ekomelaka yo na nzela na yango, mpo opesi nzela na molimo ya bobangi ya kindoki esala mosala kati na konokono. Boye, mabe nyonso oyo ewutaka na molimo yango, ekokómela yo kaka.

Soki ondimi ete nzete moko ezali ya kindoki, solo likambo yango ekomimonisa na bomoi na yo, mpe okomona mabe yango nyonso — ata soki ezali liwa. Nzokande, okomona moninga na yo azali na nzete moko kaka boye, kasi eloko moko mabe esalelaki ye te.

Mpo bobangi nyonso ezalaka na etumbu.

Soki ondimi ete mpuku oyo ezali na ndako na yo nde esalaka ete ozala mobola mpe okende liboso te, bongo bobola ekoya na nzela ya mpuku yango yango. Okofungama butu mobimba kosambela mpe kokamela,

kasi makambo ekobongwana te. Mpuku mosusu akoleka lisusu, mpo ofungoli ekuke ya bobangi na nzela ya bikelamu wana. Kasi moninga na yo akomona mpuku, akokanisa kaka ete ndako na ye ezali peto te, akosala bopeto, akoluka nzela ya koboma yango, mpe akokoba bomoi na ye na esengo.

Yango nde etumbu ya bobangi, bandeko.

Soki okuti ndɔndɔ (bundi) mpe ondimi ete atindami mpo na komemela yo pasi, boye pasi yango ekoya kaka na nzela nyonso.

Mpo Biblia elobi ete bondimi ezali kondima na bosolo makambo oyo tozali kozela. Soki ozali na kondima ya solo ete pasi ekoya mpo na ndɔndɔ oyo omoni, boye ekoya mpenza ndenge ondimi.

Nzokande, ndɔndɔ azalaki kaka koleka nzela na ye ya butu, mpe na mbala moko akutanaki na yo. Kasi mpo opesi esika na molimo ya bobangi ya liwa mpe kindoki, yango esalelaki ndɔndɔ yango. Mpe mikolo moke sima, okoyoka pasi moko, mpe okokanisa ete ezali mosakoli ekokisami, nzokande ezali bobangi nde ebimisaki mbuma oyo ozalaki kozela.

Ndeko, soki ozali kati na Kristo, osengeli te kozala na bomoi ya kobanga eloko nyonso. Ata soki nguyanya ya molili ezali solo, Nkolo Yesu alobaki na

biso boye:

Marko 16:18 (Mokanda na Bomoi):

“Bakokamata banyoka na maboko; ata soki baminwi eloko ya koboma, ekosala bango mabe ata moke te.”

Bakoki kosalela yo kindoki, kasi ekosala yo mabe te soki ozali kati na Kristo. Bakoki kobongisela yo bilei ya kindoki oyo ewuti se na lifelo, kasi ekosala yo mabe ata moke te, mpo nguya oyo ezali kati na yo ELEKI ya bango nyonso. Kasi soki okomi kotambola-tambola na bobangi, koluka nzela nyonso ya komibatela na biloko nyonso ozali komona, okokutana na mikakatano mingi mpenza na mokili oyo, mpe okosepela ata moke te na lobiko na yo.

Bomoi na yo ekokóma kaka bitumba ya mokolo na mokolo, ata ntina ezali te.

Yango wana, soki ozali moko kati na bato oyo bazokaki na mateya ya bolembu oyo ezali koteyama bisika nyonso, nalingi naye bisa yo lelo oyo: bandá lisusu sika elongo na Kristo. Bima na bokangami yango, mpe bimipesa mingi na kotanga Biblia koleka koyoka masapo ya kimvuka

MOTO OYO AZALI NA BOBANGI, AZUAKA KAKA LIKAMBO OYO AZALI
KOBANGA.

mpe ya bandoki. Mokemoke, okobanda kozwa kimia kati na motema na
yo, ndenge Biblia elobi:

Yoane 8:32 (Mokanda na Bomoi):

“Bokoyeba solo, mpe solo yango ekobikisa bino.”

Shalom.

Share on:
WhatsApp